

宋明理學家年譜

于浩
輯



北京圖書館
出版社

10

宋明理學家年譜

于浩輯

第十冊目錄

薛文清公年譜	一卷	(明)楊鶴、楊嗣昌編	一八九
明薛文清公年譜	一卷	(清)楊希閔編	二二九
胡文敬公年譜	一卷	(清)楊希閔編	二八三
陽明先生年譜	三卷	(明)錢德洪編 羅洪先考訂	五九七
王陽明先生圖譜	一卷	(明)鄒守益編	六七三
陽明先生年譜	一卷	(明)施邦曜編	一

薛文清公像



薛文清公年譜

武陵後學楊鶴編次

鄉後學沁水張銓校梓

先生諱瑄字德溫姓薛氏別號敬軒學者稱為敬軒先生世居山西河津南薛里其先出奚仲至隋唐間最顯如河東三鳳是也族大而繁沒而葬于汾陰之南坡者封樹纍纍焉祖仁生直直生常常生仲義通經術以元故不仕教授鄉里仲義生貞是為先生父教諭公洪武甲子舉于鄉歷官教諭幾四十年而終後先生貴仲義及公皆贈通議大

夫大理卿祖母齊及齊母皆為淑人云

太祖高皇帝洪武二十二年己巳八月初十日子時先生生于北平之元氏

按教諭公以乙丑除真定元氏教諭既之官迎父仲義母齊氏俱至任娶司訓平定齊魯道女生先生先一夕齊氏夢莪冠紫衣人來謁已而誕先生于學舍肌膚瑩于水晶五臟洞露目光如漆家人怪欲棄之祖仲義聞啼聲力止曰體清而聲洪必異人也因覽初度以卜喜曰此兒將大吾門矣

二十七年甲戌先生六歲在元氏

二十八年乙亥先生七歲侍教諭公官滎陽

教諭公官元氏九年赴闕 帝擇儒臣備顧問者

二十人公與焉 上御奉天門命諸儒講論五經

同異公進說大禹謨音暢義明克動宸聽廷臣以
為能三閱月罷除滎陽教諭先生隨侍祖教以小
學四書日千百言即成誦不為嬉戲端坐如成人
姊妹莫敢過其前性善詩賦人以為天授云

建文帝洪武三十二年己卯先生十一歲在滎陽

居滎之五年 朝例罷北方學校改除教諭公官

馬湖平夷長官司吏目

二十三年庚辰先生十二歲侍教諭公官馬湖馬湖
土宮子弟喜先生幼能文爭負至其家請為作詩
詞教讀書晚奉小豚送之以為常嘗著平雲南賦
上沐國公公大奇其材教諭公以是無虞于夷獠
三十五年壬午先生十四歲在馬湖
是年五經四書皆通大義

成祖永樂元年癸未先生十五歲在馬湖

帝下 詔諸改官者悉從舊教諭公復官榮陽

三年甲申先生十六歲侍教諭公如榮陽

按先生有憶昔行云憶昔年纔十二三老親携我

遊西南西南道路蜀山裏累月不盡經巉岩當時
正值春光麗紅紫千林競妖媚綠蘿覆逕搖溪烟
清風掠面送花氣羈懷未解怯險艱青泥坂滑石
磴盤路夾陰崖白日暮梯峻危棧蒼空寒寒空石
壁插江脚斷痕疑是鬼斧鑿倒懸古木星斗迷亂
灑流泉風雨作憑空一望山疊重烟溪霧谷相鬱
滄積陰絕險足妖怪深叢大野多蛇龍復有劒閣
橫天絕時清關險成虛設關南石龕夜宿時子規
叫落龕前月成都開豁自一川盛夏又泛岷江船
蠻中忽忽幾寒暑新正乃有中州旋骨肉相隨于

萬里回首舊遊如夢裏三十年來白髮生坐想雙
親淚如水觀此則先生當以庚辰春度馬湖是年
春返旆中州也

冬抵榮陽任

教諭公門下士咸尊先生為師

母齊淑人卒

先生朝夕哭奠如成人禮按先生作行畧云妣
生男二某及瑋妣卒時某始十六歲示弟瑋詩曰
先母亡時汝四春獨來戴卒于何地以汾陰阡表
考之教諭公官馬湖結茅以居或至食不繼累日

齊母能安貧淡以助廉焉永樂紀元詔改官者悉如舊明年冬復任滎陽先生年十六矣不聞扶視如滎則卒乎滎陽可知也妣卒後有陳宗問贈先生詩乃曰十五能文實可竒先生書詩後亦曰余年方十五何耶今依行畧附甲申之冬其是與否未敢臆斷云

三年乙酉先生十七歲在滎陽

始厭科舉之學慨然以求道為志精思力踐一言一動必質諸書微有不合竟夜反側不成寐鄰人陳宗問叅政河南行部至滎亟請見不往宗問異

之因訪于學舍索詩藁觀焉謂曰子所作才泓氣
昌當為大儒非吾儕備員苟祿者比也欲以奇童
薦諸朝固辭乃止因贈先生詩有知爾晚來成大
器願修德業贊雍熙之句

六年戊子先生二十歲在滎陽

按先生詩將歸山西留贈陳廣文三十韻內云未
窮詩酒興俄動蓼莪哀荏苒逾三載栖遲愧寸才
聊為萍水別近擬故山回又云昊天恩罔極風木
意難裁未遂林烏報頻驚離雁催又次廣文韻留
別二律有滎陽南望萬山攢偶此成家計未安之

句乃在滎陽作也庚子冬贈王汝霖序云余歸故鄉得公之政之詳別去數歲今年冬復歸河南之鄆陵留別詩有曰憶昔少年登公堂公堂開宴羅笙簧中間契濶十年餘千里關山恨索居乃知庚子前十餘年先生曾還里與滎陽留別詩適合意有旋家葬母之行也丙午春先生葬教諭公前三日啓齊母柩至日祔豈始遷自滎陽千里外耶又胡不聞權厝何地返葬何時耶今姑錄此以志疑焉

七年己丑先生二十一歲侍教諭公官玉田

教諭公任滿榮陽徙玉田時玉田多賢豪長者濟南王素亨大梁范汝舟東萊魏希文永嘉徐蘊夫安陽苑仲仁海昌李大亨諸公皆年德老成先生禮延之家講論經書子史泛及天文地理二氏之談諸老退謂人曰此子聰明特異力行可畏聖門有人矣皆避師席結為友與習宋諸儒性理諸書久之先生嘆曰此道學正脉也盡焚詩賦草專精性命至忘寢食

十六年戊戌先生三十歲在玉田

十七年己亥先生三十一歲任教諭公官鄆陵教諭

公任玉田九年徙鄆陵 朝例學博乏科者充戎
公固欲先生應科目先生即任中補邑弟子員司
訓王惟善著鄆陵志成先生為作序

按阡表云永樂十七年先君徙鄆陵丁太父憂去
官繼丁太母憂家居五年起復河內教諭今由官
河內時逆推之當以是年去官叅考贈王汝霖序
似又宜在庚子歲

十八年庚子先生三十二歲

秋八月舉河南鄉試第一

冬歸鄆陵將隨計有贈王汝霖大尹序及留別詩

十九年辛丑先生三十三歲

春三月登曾鶴齡榜進士

夏五月還家省侍

有詩衛水南旋雲漠漠晋山西上馬駢駢君親恩
比滄溟大忠孝深期願莫違又舟中雜興十八首
其六細草微茫間渚沙烟林杳靄暗漁家舟行不
辨東西處但倚危檣看月華其八天高雲影層層
出野曠河流曲曲長百丈牽風晴裊裊櫓聲搖月
夜茫茫其十三水畔人家舟作屋飄飄身世長兒
孫幾回睡足蘆花月又引帆檣過別村時學士楊